

दिनांक 14.04.2024
समय: 18.50 बजे

आकाशवाणी जयपुर-अजमेर

प्रादेशिक समाचार ।

- लोकसभा आम चुनाव मांय प्रचार रो घमासाण चरम माथे-स्टार प्रचारकां लगायो ऐड़ी-चोटी रो जोर ।
- भारतीय जनता पार्टी घोषणा पत्र कर्यो जारी-एक राष्ट्र-एक चुनाव, समान नागरिक संहिता अर एकल मतदाता सूची रो करी ज्यो वादो ।
- प्रदेश मांय दो भीषण सडक हादसा मांय 10 लोगा री मौत ।
- संविधान निर्माता बाबा साहब भीमराव अम्बेडकर री जयंती माथे आज कृतज्ञ राष्ट्र दी भावभीनी श्रद्धाजंलि ।

000

प्रदेश मांय लोकसभा आम चुनाव रा पैला चरण रा मतदान मांय हफ्ताभर ऊं कम बगत रेहवता चुनाव प्रचार मांय पार्टियां रा स्टार प्रचारकां अर राष्ट्रीय नेतावां पूरा ताकत लगा दी है । भीनमाल मांय आज कांग्रेस री राष्ट्रीय महासचिव प्रियंका गांधी जालौर लोकसभा सीट ऊं पार्टी उम्मीदवार वैभव गहलोत री हिमायत मांय जनसभा करी । श्रीमती गांधी भाजपा माथे केई आरोप मंडतां देश हित मांय वोट देवण री अरज करी ।

.....

ई मौके पैली रा मुख्यमंत्री अशोक गहलोत अर पार्टी रा प्रदेश प्रभारी सुखजिंदर रंधावा समेत केई नेता मौजूद रह्या । दूजी कानी मुख्यमंत्री भजन लाल शर्मा आज भरतपुर लोकसभा सीट माथे पार्टी उम्मीदवार रामस्वरूप कोली री हिमायत मांय जनसभावां करी । श्री शर्मा भरतपुर रा कुम्हेर अर सीकरी मांय कह्यो के प्रधानमंत्री नरेन्द्र मोदी री अगुवाई मांय भारत रो दुनियां मांय सनमान बध्यो है । वणा भाजपा रा विकास कामां ने गिणावता कांग्रेस माथे तुष्टिकरण अर जनता ने गुमराह करण रो आरोप माण्ड्यो । मुख्यमंत्री भजन लाल शर्मा आज भरतपुर मांय रोड शो ई कर्यो ।

000

भारतीय जनता पार्टी लोकसभा चुनाव सारू आज आप रो घोषणा-पत्र काढ दियो है । इण ने संकल्प पत्र नाम दीरीज्यो है। नुवी दिल्ली मांय भाजपा मुख्यालय मांय काढी ज्या संकल्प-पत्र मांय **एक राष्ट्र-एक चुनाव**, समान नागरिक संहिता अर **एकल मतदाता सूची** रो वादो करी ज्यो है। भाजपा रा ठावां नेता अर **प्रधानमंत्री नरेंद्र मोदी**, पार्टी अध्यक्ष जगत प्रकाश नड्डा, राजनाथ सिंह, अमित शाह अर निर्मला सीतारमण री मौजूदगी मांय ओ संकल्प-पत्र जारी करी ज्यो । घोषणा-पत्र मांय भाजपा **प्रधानमंत्री गरीब कल्याण अन्न योजना** रे तैत मुफ्त राशण री सुविधा ने आवता पांच साल ताई चालता राखण री बात कही ज्यी है। साथै ई **आयुष्मान भारत योजना** मांय देश रा सगळां बुजुर्ग रहवासियां ने भेळा करण रो वादो करी ज्यो है।

ई मौके पार्टी रा ठावां नेता अर प्रधानमंत्री नरेंद्र मोदी कह्यो के संकल्प पत्र नुजवाना, महिलावां, काश्तकारां अर गरीबां ने मजबूत बणावे है, जो विकसित राष्ट्र रा चार मजबूत थाम्बा है। श्री मोदी कह्यो के संकल्प पत्र जीवन री गरिमा अर जीवन री गुणवत्ता माथे केंद्रित है।

000

लोकसभा आम चुनाव मांय सौ फीसदी मतदान सारू मतदातावां ने जागरूक करण सारू चलायी जाय री स्वीप गतिविधियां रे तैत आज ई राज्यभर मांय केई कार्यक्रम व्ह्या। पैला चरण रा मतदान मांय फगत पांच दिन रो बगत रेहवता चुनाव मेहकमो सगळा दर्जा रा मतदातावां ने अभियान ऊं जोडन मांय जुट्यो है। ई कडी मांय दौसा मांय गाडिया लुहार अर घुमन्तू पिरवारां ने मतदान रो महतव बता र वां ने वोट जरूर देवण ने कही ज्यो। झालावाड मांय बाईक राइडर क्लब कानी ऊं मतदान रो संदेश देवता रेली निकाळी ज्यी। जैसलमेर रा हमीरा गांव मांय जिला कलेक्टर प्रताप सिंह बुजुर्ग मतदातावां रा घर जाय ने होम वोटिंग सुविधा रो जायजो लियो। हनुमानगढ री नवां पंचायत मांय जिला प्रशासन कानी ऊं पीळा चावळ बाट ने वोट देवण रो बुलावो दीरीज्यो। करौली मांय मतदाता जागरूकता रैली निकाळी ज्यी। सवाईमाधोपुर मांय दिव्यांग मतदातावां रो स्वगत करी ज्यो अर नुवां मतदातावां ने शपथ दीरायी ज्यी। स्वीप गतिविधियां रे तैत आज **आओ बूथ चले** कार्यक्रम व्हयो। चुनाव कर्मिया घर-घर जाय ने मतदाता पर्ची बाटी साथै ई मतदान केन्द्रां माथे मार्गदर्शिका राखी ज्यी है, जिण मांय सगळी मतदान प्रक्रियां री जाणकारी दीरीजी है। दौसा जिला कलेक्टर देवेन्द्र कुमार यादव मतदातावां ऊं लोकतंत्र रा उत्सव मांय बढ चढ ने हिस्सो लेवण री अरज करी है।

000

सीकर जिला रा फतेहपुर मांय आज एक ट्रक अर कार री टक्कर रे पछे कार मांय लागी आग मांय 7 लोग जिन्दा जळ गया। जाणकारी मिलण माथे पूगी पुलिस दमकल री मदद ऊं घणी कोशिश करता आग माथे काबू कर्यो और ब्यौरो म्हारा खबरनवीस ऊं—

एक दूजा हादसा मांय भीलवाड़ा रा आसीन्द मांय एक एस.यू.वी. गाडी मोटरसाईकिल रे टक्कर मार दी। हादसा मांय एक महिला समेत तीन लोगां री मौत व्हे गयी।

000

राष्ट्र आज संविधान निर्माता बाबा साहब डॉ. भीमराव आम्बेडकर री 133 वीं जयंती माथे वां ने सिरधा रे साथे नमन करे। राष्ट्रपति द्रौपदी मुर्मु, उपराष्ट्रपति जगदीप धनखड़ अर प्रधानमंत्री नरेन्द्र मोदी आज संसद मांय डॉ. भीमराव आम्बेडकर री मूरत माथे फूल अर्पण कर्या। अम्बेडकर जयंती माथे प्रदेशभर मांय ई न्यारा—न्यारा संगठना अर अर संस्थानां कानी ऊं केई कार्यक्रम व्ह्या। सरहदी जिला जैसलमेर रा मोहनगढ मांय आईदान मिंदर मांय कार्यक्रम व्ह्यो। इण मांय घणी तादाद मांय हलकावासी भेळा व्ह्या। बाडमेर रा चौहटन मांय वाहन रैली निकाळ ने जयघोष करी ज्यो। बांसवाड़ा मांय जिला कांग्रेस कमेटी कानी ऊं कार्यक्रम राख्यी ज्यो जिण मांय वठां रा जन नुमाईन्दा अर पार्टी कार्यकर्ता भेळा व्ह्या। भीलवाड़ा रा अग्रवाल भवन मांय व्ह्या कार्यक्रम मांय बाबा साहब रा कामा ने याद करी ज्यो। ई मौके रक्तदान शिविर लगायी ज्यो। हनुमानगढ मांय अम्बेडकर जयंती माथे प्रभात फेरी निकाळी ज्यी। ई दौरान टिब्बी मांय अम्बेडकर चौक माथे पुष्पांजलि कार्यक्रम व्ह्यो। चूरु रा कलेक्ट्रेट परिसर मांय बाबा साहब री मूरत माथे फूल अर्पण रो कार्यक्रम राख्यी ज्यो। कैकडी रा गुलगांव ग्राम पंचायत मांय अम्बेडकर चौक माथे कार्यक्रम व्ह्यो। बूंदी रा अम्बेडकर चौक मांय भारतीय जनता पार्टी कानी ऊं पुष्पांजलि कार्यक्रम व्ह्यो। झालावाड रा झालरापाटन नगर पालिका कानी ऊं सफाई मित्रां अर कचरो बीणण वाळां रो सनमान करी ज्यो। राजधानी जयपुर रा अम्बेडकर भवन मांय व्ह्या कार्यक्रम मांय मुख्यमंत्री भजन लाल शर्मा भेळा व्ह्या।

ई मौके वणा कह्यो के आपा रो देश अम्बेडकर री भावना ऊं आगे बध रह्यो है अर बाबा रा सपना ने आपा सब ने मिलने साकार करणा है। प्रदेश रा दूजा हलका ऊं ई अम्बेडकर जयंती जळसा पूरण मणाया जावण रा समचार है।

000

राज्य मांय लोकसभा सीटां रा चुणावी विश्लेषण मांय आज आपा चाला झुन्झुनू संसदीय हलकां मांय शेखावटी हलकां री आ लोकसभा सीट केई मायनां मांय खास है। लाम्बी भगत ताई ई सीट मांथे कांग्रेस रो दबदबो रह्यो है फेरु ई लारला दो चुणाव मांय भारतीय जनता पार्टी अठे आप रो जनाधार तैयार कर लियो है। और ब्यौरो म्हारा खबरनवीस ऊं—

0000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है जयपुर ऊं दिव्यांग मतदाता पुलकित शर्मा रो संदेश-

000
